

Ո Ր Ո Շ ՈՒ Մ թիվ-346
Վարչական տույժ նշանակելու մասին

«27» դեկտեմբերի 2018թ.

ք.Երևան

ՀՀ պետական եկամուտների կոմիտեի իրավաբանական վարչության պետ Ա. Մնացականյանս, քննելով Գառնիկ Մարտինի Ֆարմանյանի վերաբերյալ նյութերը.

Պ Ա Ր Զ Ե Ց Ի՝

2018 թվականի սեպտեմբերի 7-ին ՀՀ ՊԵԿ ՆԱ վարչության աշխատակիցները Բագրատաշենի մաքսային կետ-բաժնում զննության են ենթարկել Վրաստանից ժամանած, ՀՀ քաղաքացի Գառնիկ Ֆարմանյանի կողմից վարվող «NISSAN» մակնիշի, 35AC040 հաշվառման համարանիշի ավտոմեքենան և սրահից հայտնաբերել առանց հայտարարագրման ՀՀ մաքսային սահմանով տեղափոխված 5 կգ ընդհանուր քաշով տարբեր տեսակի դեղորայք:

Փաստի առթիվ Գառնիկ Ֆարմանյանի նկատմամբ ՀՀ մաքսային օրենսգրքի 203-րդ հոդվածի հատկանիշներով կազմվել է մաքսային կանոնների խախտման վերաբերյալ արձանագրություն, իսկ 5 կգ ընդհանուր քաշով դեղորայքը վերցվել և ի պահ է հանձնվել «Ձյունիկ տերմինալ» ՍՊ ընկերության մաքսային հսկողության տարածք:

Վարչական վարույթի ընթացքում Գառնիկ Ֆարմանյանը բացատրություն է տվել այն մասին, որ 2018 թվականի սեպտեմբերի 7-ին իր կողմից շահագործվող «NISSAN» մակնիշի, 35AC040 հաշվառման համարանիշի ավտոմեքենայով մեկնել է Վրաստանի և Հայաստանի միջև գտնվող չեզոք գոտի, որտեղ պետք է դիմավորեր Թուրքիայից ՀՀ ժամանող ավտոբուսը և քանի որ բարեկամը՝ Տաթևիկ Ոսկանյանը տառապում է շաքարային դիաբետ հիվանդությամբ ու իրեն հարկավոր է երկարատև բուժում և շատ քանակի դեղեր, իսկ պահանջվող դեղերը ՀՀ-ում կամ թանկ արժեն կամ ընդհանրապես չեն վաճառվում, այդ իսկ պատճառով Տաթևիկի բուժման համար հարկավոր դեղորայքը խնդրել էր իր ծանոթին գնել Թուրքիայի դեղատներից: Սույն թվականի սեպտեմբերի 7-ին Թուրքիայից ՀՀ է ժամանել դեղը տեղափոխող ավտոբուսը: Ինքը նույնպես մուտք է գործել ՀՀ և ուղևորվել Բագրատաշենի մաքսային կետ-բաժնի զննություն իրականացնելու համար նախատեսված տարածք, որտեղ գտնվում էր հիշյալ ավտոբուսը: Քանի որ հասկացել է, որ չունի բավարար դրամական միջոցներ հիշյալ դեղորայքի մաքսային ձևակերպումները իրականացնելու համար, որոշել է առանց մաքսային ծառայության աշխատակիցներին տեղեկացնելու, Բագրատաշենի մաքսային կետ-բաժնի զննություն իրականացնելու համար տարածքում գտնվող ավտոբուսից վերցնել հիշյալ դեղորայքը և տեղափոխել իր կողմից շահագործվող «NISSAN» մակնիշի, 35AC040 հաշվառման համարանիշի ավտոմեքենայի մեջ՝ հետևի նստատեղին: Որոշ ժամանակ անց իրեն են մոտեցել ՀՀ ՊԵԿ ՆԱ վարչության աշխատակիցները և հարցրել հիշյալ ավտոմեքենայում առկա հայտարարագրման ընթակա ապրանքների մասին, ինչին պատասխանել է, որ

հայտարարագրման ենթակա ապրանքներ չունի, որից հետո իր կողմից շահագործվող «NISSAN» մակնիշի, 35AC040 հաշվառման համարանիշի ավտոմեքենան գննվել է և սրահի ետևի նստատեղի վրայից հայտնաբերվել 5 կգ ըդհանուր քաշով տարբեր տեսակի դեղորայք: Փաստի առթիվ իր նկատմամբ կազմվել է մաքսային կանոնների խախտման վերաբերյալ արձանագրություն, իսկ հայտնաբերված դեղորայքը վերցվել և ի պահ է հանձնվել «Ձյունիկ Տերմինալ» ՍՊ ընկերության մաքսային պահեստ:

Գառնիկ Ֆարմանյանը միաժամանակ հայտնել է, որ գիտակցել է, որ թույլ է տվել մաքսային կանոնների խախտում, առանց հայտարարագրման ՀՀ մաքսային սահմանով 5 կգ ընդհանուր քաշով տարբեր տեսակի դեղորայք տեղափոխելով, զոջում է կատարվածի համար, դեղորայքը չի հայտարարագրել, օրենք չիմանալու պատճառով, նաև մտածել է, որ անձնական օգտագործման համար է, այլ ոչ թե վաճառքի, դա էլ հիմնական պատճառն է դեղորայքն չհայտարարագրելու: Բացի այդ չի մտածել, որ անձնական օգտագործման համար սահմանված է որոշակի քանակություն, հակառակ դեպքում նման քանակության դեղորայք չէի տեղափոխի ՀՀ մաքսային սահմանով:

Վարչական վարույթի ընթացքում Գառնիկ Ֆարմանյանի կողմից չեն ներկայացվել հիշյալ դեղորայքի ձեռք բերման որևէ փաստաթղթեր:

ԵԱՏՄ մաքսային օրենսգրքի 104-րդ հոդվածի համաձայն՝ ապրանքները ենթակա են մաքսային հայտարարագրման դրանք մաքսային ընթացակարգով ձևակերպելու կամ սույն Օրենսգրքին համապատասխան սահմանված այլ դեպքերում: Մաքսային հայտարարագրումն իրականացվում է հայտարարատուի կամ մաքսային ներկայացուցչի կողմից, եթե սույն օրենսգրքով այլ բան սահմանված չէ: Մաքսային հայտարարագրումն իրականացվում է գրավոր և (կամ) էլեկտրոնային եղանակով:

ԵԱՏՄ մաքսային օրենսգրքի 105-րդ հոդվածի համաձայն՝ մաքսային ընթացակարգերով ձևակերպելիս, բացառությամբ «մաքսային տարանցում» մաքսային ընթացակարգի, մաքսային մարմին է ներկայացվում ապրանքների մասին հայտարարագիր: Օրենսգրքի 110-րդ հոդվածի համաձայն՝ միության մաքսային տարածք ներմուծվող ապրանքների մասին մաքսային հայտարարագիրը ներկայացվում է մինչև ապրանքների ժամանակավոր պահպանման ժամկետի լրանալը կամ սույն օրենսգրքով սահմանված այլ ժամկետում: Միության մաքսային տարածքից արտահանվող ապրանքների մասին մաքսային հայտարարագիրը ներկայացվում է մինչև Միության մաքսային տարածքից դրանց մեկնումը, եթե սույն Օրենսգրքով այլ բան սահմանված չէ: ԵԱՏՄ մաքսային օրենսգրքի 2-րդ հոդվածի 7-րդ կետի համաձայն՝ հայտարարատուն այն անձն է, որը հայտարարագրում է ապրանքներ կամ որի անունից հայտարարագրվում են ապրանքներ, իսկ 35-րդ կետի համաձայն մաքսային հայտարարագրումը մաքսային մարմնում մաքսային հայտարարագրի միջոցով ապրանքների վերաբերյալ տեղեկությունների, ընտրված մաքսային ընթացակարգի վերաբերյալ եւ (կամ) ապրանքների բացթողման համար անհրաժեշտ այլ տեղեկությունների հայտագրում է:

ԵԱՏՄ մաքսային օրենսգրքի 83-րդ հոդվածի համաձայն որպես մաքսային ընթացակարգերով ձևակերպվող ապրանքների հայտարարատու կարող է հանդես գալ՝ անդամ պետության անձը՝ որն օտարերկրյա անձի կետ կնքված այն գործարքի

կողմերից է, որի հիման վրա ապրանքները տեղափոխվում են Միության մաքսային սահմանով, որի անունից և (կամ) որի հանձնարարությամբ կնքվել է նշված գործարքը, որն ունի ապրանքների տիրապետման, օգտագործման և (կամ) տնօրինման իրավունք, եթե ապրանքները Միության մաքսային սահմանով տեղափոխվում են այն գործարքի շրջանակներից դուրս, որի կողմերից մեկն օտարերկրյա անձ է, որը Միության մաքսային տարածքում գտնվող օտարերկրյա ապրանքների մասով օտարերկրյա անձի կամ անդամ պետության անձի հետ կնքված գործարքի կողմերից է: Օրենսգրքի 84-րդ հոդվածի 2-րդ կետով սահմանված են հայտարարատուի պարտականությունները, այն է՝ կատարել ապրանքների մաքսային հայտարարագրում, մաքսային մարմին ներկայացնել մաքսային հայտարարագրում հայտագրված տեղեկությունները հաստատող փաստաթղթեր, ներկայացնել հայտարարագրվող ապրանքները և վճարել մաքսային վճարները, իսկ 3-րդ կետի համաձայն հայտարարատուն անդամ պետությունների օրենսդրությանը համապատասխան, պատասխանատվություն է կրում սույն հոդվածի 2-րդ կետով նախատեսված պարտականությունները չկատարելու, մաքսային հայտարարագրում ոչ հավաստի տեղեկություններ հայտագրելու, ինչպես նաև մաքսային ներկայացուցչին անվավեր, այդ թվում՝ կեղծ և (կամ) ակնհայտ ոչ հավաստի (սուտ) տեղեկություններ պարունակող փաստաթղթեր ներկայացնելու համար:

ԵԱՏՄ մաքսային օրենսգրքի 267-րդ հոդվածի 1-ին կետի համաձայն՝ անձնական օգտագործման ապրանքների արժեքը հայտագրվում է անձնական օգտագործման ապրանքների մաքսային հայտարարագրման ժամանակ ուղեւորային մաքսային հայտարարագրում՝ չեկերի, հաշիվների մեջ, հաշվեպիտակների եւ պիտակների վրա կամ անձնական օգտագործման ապրանքների արժեքի մասին տեղեկություններ պարունակող՝ այդ ապրանքների ձեռքբերման վերաբերյալ այլ փաստաթղթերում նշված արժեքի հիման վրա՝ բացառությամբ միջազգային փոստային առաքանիներով ուղարկվող անձնական օգտագործման ապրանքների, որոնց առնչությամբ որպես ուղեւորային մաքսային հայտարարագիր օգտագործվում են Համաշխարհային փոստային միության ակտերով նախատեսված եւ միջազգային փոստային առաքանիներն ուղեկցող փաստաթղթերը:

Անձնական օգտագործման ապրանքների արժեքը հաստատելու համար ֆիզիկական անձի կողմից ներկայացվում են փաստաթղթերի բնօրինակները, որոնց հիման վրա հայտագրվել է անձնական օգտագործման ապրանքների արժեքը, իսկ փոխադրողի կողմից առաքվող անձնական օգտագործման ապրանքների առնչությամբ՝ փաստաթղթերի բնօրինակները կամ պատճենները, իսկ 3-րդ կետի համաձայն՝ մաքսային մարմինն իր տրամադրության տակ գտնվող՝ նույնանման ապրանքների գնի մասին տեղեկատվության հիման վրա անձնական օգտագործման ապրանքների արժեքը որոշում է ֆիզիկական անձի մոտ սույն հոդվածի 1-ին կետում նշված անձնական օգտագործման ապրանքների արժեքի մասին տեղեկություններ պարունակող անհրաժեշտ փաստաթղթերի բացակայության դեպքում:

ՀՀ «Փորձագիտական կենտրոն» ՊՈԱԿ փորձագետի 03.12.2018թ. թիվ 76141805 եզրակացության համաձայն՝ փորձաքննությանը ներկայացված 12 անվանում դեղամիջոցները գործարանային արտադրության են, իրենց բաղադրության մեջ

թմրամիջոցներ, հոգեմետ նյութեր, պրեկուրսորներ, խիստ ներգործող ու թունավոր նյութեր չեն պարունակում: 12 անվանում դեղորայքից 6 անվանում ՀՀ-ում գրանցված չլինելու պատճառով փորձագետի կողմից չեն գնահատվել, իսկ 6 անվանման դեղորայքի շուկայական արժեքը 2018 թվականի սեպտեմբերի 7-ի դրությամբ կազմել է 2724800 դրամ:

ՀՀ-ում գրանցված չլինելու և Գառնիկ Ֆարմանյանի կողմից հիշյալ դեղորայքի ձեռք բերման որևէ փաստաթղթեր չներկայացվելու պատճառով մաքսային մարմնի կողմից հնարավոր չի եղել որոշել 6 անվանում դեղորայքի մաքսային արժեքը:

Պարզելու համար, թե որքան է կազմել Գառնիկ Ֆարմանյանի կողմից առանց հայտարարագրման ՀՀ մաքսային սահմանով տեղափոխված դեղորայքի մաքսային արժեքը և գանձման ենթակա մաքսային վճարների չափը, ինչպես նաև դեղորայքը չհայտարարագրելու հետևանքով առաջացել է ոչ սակագնային կարգավորման միջոցների չկիրառում, թե՛ ոչ, 27.12.2018թ. գրությամբ հարցում է կատարվել ՀՀ ՊԵԿ մաքսային հսկողության վարչություն, որտեղից ստացված 27.12.2018թ. գրության համաձայն ՀՀ «Փորձագիտական կենտրոն» ՊՈԱԿ-ի փորձագետի 03.12.2018թ. թիվ 76141805 եզրակացության հետազոտության բաժնում նկարագրված դեղորայքի մաքսային արժեքը 07.09.2018թ. դրությամբ, ֆիզիկական անձի կողմից ոչ ԵԱՏՄ անդամ երկրից ներմուծելու դեպքում կկազմի 2270576 դրամ, իսկ մաքսային վճարները՝ 454115 դրամ (ԱԱՀ): Դեղորայքն ընդգրկված է ԵՏՀ կոլեգիայի 21.04.2015թ. թիվ 30 որոշմամբ սահմանված սահմանափակումների ենթակա ապրանքների միասնական ցանկում (կետ 2.14):

ԵԱՏՄ մաքսային օրենսգրքի 2-րդ հոդվածի 10-րդ կետի համաձայն՝ «արգելքներն ու սահմանափակումներն»՝ Միության մաքսային սահմանով տեղափոխվող ապրանքների նկատմամբ կիրառվող ոչ սակագնային կարգավորման միջոցներ են:

«Եվրասիական տնտեսական միության մասին» պայմանագրի 46-րդ հոդվածով սահմանված են ոչ սակագնային կարգավորման միջոցները, այն է. «Երրորդ երկրների հետ առևտրում Միության կողմից ընդունվում են ոչ սակագնային կարգավորման հետևյալ միջոցները՝ 1) ապրանքների ներմուծման և (կամ) արտահանման արգելք, 2) ապրանքների ներմուծման և (կամ) արտահանման քանակական սահմանափակումներ, 3) ապրանքների ներմուծման և (կամ) արտահանման բացառիկ իրավունք, 4) ապրանքների ներմուծման և (կամ) արտահանման ավտոմատ լիցենզավորում (հսկում), 5) ապրանքների ներմուծման և (կամ) արտահանման թույլատրական կարգ»:

ՀՀ կառավարության 20.09.2000թ. թիվ 581 որոշման 5-րդ կետի պահանջների համաձայն՝ դեղերը և (կամ) դեղանյութերը կարող են ներմուծվել ՀՀ առողջապահության նախարարության կողմից տրված ներմուծման հավաստագրի հիման վրա, բացառությամբ նույն որոշման 8.1 կետով նախատեսված դեպքերի:

Քանի որ դեղորայքը ընդգրկված է ԵԱՏՄ Հանձնաժողովի 21.04.2015թ. <<ոչ սակագնային կարգավորման միջոցների մասին>> թիվ 30 որոշմամբ հաստատված ցանկերում և ներմուծման դեպքում սահմանված է թույլատրական կարգ, հետևաբար Գառնիկ Ֆարմանյանի կողմից դեղորայքի չհայտարարագրելը առաջացրել է ոչ սակագնային կարգավորման միջոցների չկիրառում:

Գառնիկ Ֆարմանյանը 20.12.2018թ. ծանուցագրով 2018 թվականի դեկտեմբերի 27-ին հրավիրվել է ՀՀ ՊԵԿ իրավաբանական վարչություն՝ իր նկատմամբ ՀՀ մաքսային օրենսգրքի 203-րդ հոդվածի հատկանիշներով սկսված վարչական գործի քննությանը մասնակցելու համար և միաժամանակ նախազգուշացվել, որ համաձայն ՀՀ մաքսային օրենսգրքի 219-րդ հոդվածի՝ չներկայանալու դեպքում վարչական գործի քննությունը կիրականացվի առանց իր մասնակցության, սակայն վերջինս չի ներկայացել:

Այսպիսով, նյութերով պարզվել է, որ 2018 թվականի սեպտեմբերի 7-ին Գառնիկ Ֆարմանյանը առանց հայտարարագրման ՀՀ մաքսային սահմանով տեղափոխել է 12 անվանում տարբեր տեսակի դեղորայք, այսինքն՝ թույլ է տվել ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ նախատեսված մաքսային կանոնների խախտում, այն է Հայաստանի Հանրապետության մաքսային սահմանով տեղափոխվող ապրանքները և տրանսպորտային միջոցները չհայտարարագրելը կամ ոչ իրենց անվանմամբ հայտարարագրելը կամ հայտարարագրման ժամանակ ոչ ճշգրիտ տեղեկություններ նշելը, որի արդյունքում առաջանում է ոչ սակագնային կարգավորման միջոցների չկիրառում, ինչը հիմնավորվում է մաքսային կանոնների խախտման վերաբերյալ կազմված արձանագրությամբ, փորձագետի 03.12.2018թ. թիվ 76141805 եզրակացությամբ, ՀՀ ՊԵԿ մաքսային հսկողության վարչության 27.12.2018թ. գրությամբ և Գառնիկ Ֆարմանյանի բացատրությամբ:

Վերոգրյալի հիման վրա և ղեկավարվելով ՀՀ Մաքսային օրենսգրքի 203-րդ հոդվածի 1-ին մասի 3-րդ պարբերությամբ, 206 և 221 հոդվածներով,

Ո Ր Ո Շ Ե Ց Ի՝

1. Գառնիկ Մարտինի Ֆարմանյանին (ծնված 14.04.1985թ., ազգությամբ հայ, ՀՀ քաղաքացի, միջնակարգ կրթությամբ, բնակվող՝ ք. Երևան, Հարավ-արևմտյան Բ2 թաղամաս, 95-րդ շենք, 72-րդ բն., անձնագրի համարը՝ BA2759141) ճանաչել զանցառու ՀՀ մաքսային օրենսգրքի 203-րդ հոդվածի 1-ին մասի 3-րդ պարբերությամբ և նրան տուգանել 6 անվանում դեղորայքի մաքսային արժեքի չափով՝ 2270576 դրամ:

2. Որոշման մասին հայտնել Գ. Ֆարմանյանին՝ պարզաբանելով, որ այն կայացնելուց հետո 10 օրվա ընթացքում կարող է բողոքարկել վերադաս մաքսային մարմին (ՀՀ մաքսային օրենսգրքի 222-րդ հոդվածի 2-րդ մաս) կամ ՀՀ վարչական դատարան՝ 2 ամսվա ընթացքում (ՀՀ վարչական դատավարության օրենսգրքի 72-րդ հոդվածի 1-ին մասի 1-ին կետ):

ԻՐԱՎԱԲԱՆԱԿԱՆ
ՎԱՐՉՈՒԹՅԱՆ ՊԵՏ



ԱՐՄԱՆ ՄՆԱՑԱԿԱՆՅԱՆ